



اوتيم تكنولوجي مارا
UNIVERSITI
TEKNOLOGI
MARA

Cawangan Terengganu

Info

USAHAWAN

Usahawan Pemacu Ekonomi Mapan

Edisi 30

ISSN 1823-6421

BULETIN ADALAH HAK MILIK KEKAL MASMED UiTM CAWANGAN TERENGGANU

Solusi Inisiatif Usahawan Perusahaan Mikro, Kecil dan Sederhana (PMKS) bagi Mengatasi Kesan Kadar Kenaikan “Overnight Policy Rate” (OPR)

Fathinah binti Ismail

Arsyad Ayub Graduate Business School

UNIVERSITI TEKNOLOGI MARA, Kota Bharu, Kelantan

*Email Penulis: 2022799985@student.uitm.edu.my

Tatkala pengumuman kenaikan kadar OPR oleh Bank Negara Malaysia (BNM) sebanyak beberapa kali, telah memberi impak besar terhadap realiti semasa usahawan dari perusahaan mikro, kecil dan sederhana (PMKS) dengan secara tidak langsung berhadapan dengan masalah kelangsungan perniagaan untuk kekal bertahan di dalam pasaran. Ini berlaku apabila jualan mereka semakin hari semakin tidak memberangsangkan di samping peningkatan harga atau kos perbelanjaan barangan jualan yang juga turut meningkat.

Akibat ketidaktentuan ekonomi menyebabkan tekanan inflasi di peringkat “global” juga telah memberi sebab kenapa kadar OPR dalam negara terpaksa dinaikkan. Sekaligus, ini akan membawa bebanan kepada keseluruhan rantai pengguna. Jangkaan Keluaran Dalam Negara Kasar (KDNK) negara akan meningkat jika kenaikan OPR dilakukan, ini dilakukan bertujuan untuk mengawal kadar inflasi terus meningkat dalam negara.

Apa itu Kadar Overnight Policy Rate (OPR)?

OPR atau dikenali sebagai “Overnight Policy Rate” atau disebut dalam Bahasa Melayu iaitu Kadar Dasar Semalaman ini adalah sebuah kadar faedah untuk institusi kewangan yang telah ditetapkan oleh BNM untuk seluruh institusi kewangan atau bank di Malaysia yang memberi pinjaman dana kepada pihak yang menginginkan pinjaman dalam tempoh yang dipersetujui dalam perjanjian pinjaman [1]. Bermula dari Mei 2022, Jawatankuasa Dasar Monetari (MPC) BNM telah mengumumkan kenaikan sebanyak 25 mata asas kepada 2.00% daripada 1.75% sebelum dinaikkan sekali lagi kepada 2.25% pada Julai 2022. Kemudiannya, bank pusat sekali lagi mengumumkan kenaikan OPR sebanyak

25 mata asas kepada 2.50% pada September 2022 [2]. Berbalik kepada OPR, biasanya ia membabitkan pinjaman bank dan diyakini majoriti usahawan PMKS memohon pinjaman pembiayaan bagi membiayai perusahaan mereka.



Rajah 1 Peniaga PMKS

Sumber: <https://www.kosmo.com.my/2021/07/30/pmks-catat-rugi-rm40-7-bilion-tahun-lalu/>

Apakah kesan OPR?

Limpahan kesan secara langsung kepada usahawan PMKS akibat daripada kenaikan OPR dan rantai ekosistem di mana pengguna juga turut terkesan, antara kesannya adalah perbelanjaan isi rumah akan berkurang kerana terpaksa bayar pinjaman personal bulanan yang lebih tinggi berbanding sebelumnya. Ini akan membawa perubahan kepada sikap pengguna bertukar daripada berbelanja kepada pendekatan lebih berjimat.

Kesan kenaikan OPR ini juga tertumpu kepada usahawan PMKS yang membuat pinjaman perniagaan untuk membiayai kewangan perusahaan mereka. Apabila kadar OPR dinaikkan secara tidak langsung kadar faedah atau bunga bayaran balik bulanan untuk pinjaman tersebut juga turut meningkat. Ini cukup membebankan usahawan PMKS untuk membuat bayaran balik pinjaman apabila jualan mereka semakin menurun akibat kuasa beli pengguna untuk membeli barangan juga semakin berkurangan. Kadar kenaikan OPR yang berturut akan menjejaskan permintaan terhadap pembiayaan pinjaman yang baharu. Hong Leong Investment Bank mendapati kelulusan pinjaman pembiayaan perniagaan lebih perlahan pada September 2022 dengan berkurang kepada 37.3% berbanding 82.3% pada Ogos 2022 [3].

Apakah solusinya?

Solusi atau strategi yang boleh dilakukan untuk diperkasakan atau diolah sebagai alternatif bagi mengatasi masalah kesan kenaikan OPR ini adalah melalui kaedah penstrukturan semula kewangan perusahaan antaranya:

Megecilkan perbelanjaan operasi dalam perusahaan ("overhead")

Perbelanjaan operasi perusahaan disini adalah seperti kos tenaga kerja, kos bahan, biaya penghantaran dan sebagainya. Mungkin sebelum ini usahawan PMKS menyewa kedai untuk memasarkan jualan produk mereka. Bagi mengurangkan kos sewa, mereka boleh mengambil inisiatif untuk beralih kepada perniagaan atas talian. Mereka boleh menukar kaedah pemasaran mereka dengan memasarkan produk mereka di rumah dengan menjual produk mereka secara atas talian di mana-mana media sosial seperti platform tiktok, shopee dan sebagainya.

Inisiatif memanjangkan tempoh bayaran balik pinjaman perniagaan

Usahawan PMKS yang dimana telah membuat pinjaman pembiayaan perusahaan dengan mana-mana institusi kewangan atau bank datang ke bank untuk berunding berkenaan pengstruktur semula kadar pinjaman mereka. Pada asasnya pinjaman perniagaan merupakan pinjaman jangka masa panjang. Biasanya tempoh perjanjian bayaran balik jumlah pinjaman perniagaan mikro adalah maksima 5 tahun.

Mereka boleh mencuba untuk membuat permohonan untuk memanjangkan tempoh bayaran balik pinjaman tersebut lebih dari tempoh seperti yang tertera dalam perjanjian sebagai contoh tempoh bayaran balik pinjaman semasa adalah 3 tahun dipanjangkan sehingga maksima 5 tahun. Dengan ini nilai bayaran balik pinjaman bulanan akan mengecil bersesuaian dengan kemampuan semasa usahawan PMKS untuk membayar balik pinjaman tersebut.

Sokongan geran, monetarium, subsidi serta bantuan kewangan dari pihak kerajaan

Selain dari inisiatif dari usahawan PMKS itu sendiri, langkah-langkah dalam memperkasakan PMKS dari pihak kerajaan juga perlu untuk membantu usahawan PMKS ini untuk kekal bertahan dalam perusahaan mereka. Pemberian seperti geran, monetarium atau subsidi pinjaman pembiayaan serta bantuan kewangan lain juga amat dinantikan. Selain dapat mengurangkan pinjaman perbiayaan perusahaan akan serba sedikit membantu usahawan PMKS dalam membiayai kos perbelanjaan mereka yang makin meningkat akibat inflasi semasa.

Diharap dengan solusi inisiatif ini dapat membantu para usahawan PMKS dan juga badan berkaitan untuk menghadapi cabaran kenaikan OPR dan menjadi sebagai tunjang strategi alternatif untuk kekal bertahan dalam perusahaan pada masa-masa mendatang.

Rujukan

1. Liyana, 2020. Apa Itu OPR? <https://rnggt.com/20207964/>
2. Kosmo, September 2022. OPR naik kali ketiga berturut-turut tahun ini. <https://www.kosmo.com.my/2022/09/08/opr-naik-kali-ketiga-berturut-turut-tahun-ini/>
3. Bharian, November 2022. Kenaikan berturut-turut OPR jejas permohonan pinjaman. <https://www.bharian.com.my/bisnes/lain-lain/2022/11/1019753/kenaikan-berturut-turut-opr-jejas-permohonan-pinjaman>

